

# YR ATODLENNI

## ATODLEN 6

Rheoliad 6(e)

### Bwydydd anifeiliaid

## RHAN 1

### Cyfyngiadau ar fwydo proteinau i anifeiliaid

#### **Gwahardd bwydo protein anifeiliaid**

1.—(1) Mae'n drosedd bwydo i unrhyw anifail cnoi cil neu anifail nad yw'n cnoi cil unrhyw brotein anifeiliaid (neu unrhyw beth sy'n cynnwys protein anifeiliaid) a waherddir gan Erthygl 7 a Phennod I o Atodiad IV mewn perthynas â'r anifail hwnnw.

(2) Nid yw'r gwaharddiad yn is-baragraff (1) yn gymwys i fwydo unrhyw anifail yn unol â Phennod II o Atodiad IV.

#### **Gwaharddiadau a chyfyngiadau ar symud**

2.—(1) Pan fo gan arolygydd sail resymol dros gredu bod anifail cnoi cil neu anifail nad yw'n cnoi cil a ffermir wedi ei fwydo ag unrhyw brotein anifeiliaid (neu unrhyw beth sy'n cynnwys protein anifeiliaid), neu wedi cael mynediad ato—

- (a) sy'n waharddedig gan Erthygl 7 ac Atodiad IV mewn perthynas â'r anifail hwnnw; neu
- (b) na all yr arolygydd ganfod ei darddiad,

caiff yr arolygydd gymryd y camau a bennir yn is-baragraff (2).

(2) Caiff yr arolygydd gyflwyno hysbysiad i'r perchennog neu'r person sydd â gofal am yr anifail, yn unol â rheoliad 16, yn gwahardd neu'n cyfyngu ar symud yr anifail ac yn ei gwneud yn ofynnol ei gadw yn y modd a ddarperir yn yr hysbysiad.

(3) Pan gyflwynir yr hysbysiad mewn cysylltiad ag anifail buchol, rhaid i'r arolygydd—

- (a) sicrhau bod ei basbort gwartheg wedi ei stampio "Not for human consumption"; neu
- (b) ymafael yn ei basbort gwartheg neu ei gadw, ac mewn achos o'r fath caniateir stampio'r pasbort gwartheg yn y fath fodd cyn ei ddychwelyd.

(4) Mae'n drosedd i draddodi unrhyw anifail i'w gigydda ar gyfer ei fwyta gan bobl neu gigydda unrhyw anifail ar gyfer ei fwyta gan bobl pan fo pasbort gwartheg yr anifail wedi cael ei stampio yn unol ag is-baragraff (3).

#### **Lladd anifeiliaid**

3. Pan fo gan arolygydd sail resymol dros gredu bod anifail cnoi cil neu anifail nad yw'n cnoi cil a ffermir wedi ei fwydo ag unrhyw ddeunydd y cyfeirir ato ym mharagraff 2, neu wedi cael mynediad ato, caiff yr arolygydd gyflwyno hysbysiad i'r perchennog neu'r person sydd â gofal am yr anifail yn unol â rheoliad 16 yn ei gwneud yn ofynnol i'r perchennog neu'r person sydd â gofal am yr anifail ladd yr anifail a'i waredu fel a bennir yn yr hysbysiad.

## **Digolledu**

4.—(1) Pan leddir anifail o dan baragraff 3, caiff Gweinidogion Cymru dalu digollediad os ydynt yn ystyried bod hynny'n briodol o dan yr holl amgylchiadau, a rhaid iddynt roi'r penderfyniad ynglŷn â thalu digollediad ai peidio mewn ysgrifen.

(2) Mae'r weithdrefn apelio yn rheoliad 11 yn gymwys mewn perthynas â'r penderfyniad.

(3) Y digollediad am—

- (a) anifail buchol yw'r gwerth a bennir yn unol â pharagraffau 10 ac 11 o Atodlen 3;
- (b) anifail defeidiog neu afraidd yw'r gwerth a bennir yn unol â pharagraffau 15 ac 16 o Atodlen 4; ac
- (c) anifail nad yw'n fuchol, yn ddefeidiog nac yn afraidd yw gwerth yr anifail ar y farchnad ar yr adeg y'i lleddir, a bennir yn unol â'r weithdrefn a osodir yn rheoliad 12(3) i (7), gyda'r perchennog yn talu unrhyw ffi a godir ynglŷn â'r prisio.

## **Cyfyngu ar fwydydd anifeiliaid anghyfreithlon a'u gwaredu**

5. Pan fo arolygydd wedi nodi bwydydd anifeiliaid anghyfreithlon fel rhai yr amheuir eu bod yn cynnwys deunydd a waherddir gan Atodiad IV, caiff arolygydd gyflwyno hysbysiad i'r perchennog neu'r person sy'n meddu ar y bwydydd anifeiliaid—

- (a) i gyfyngu ar fynediad anifeiliaid i'r ardal lle cedwir y bwydydd anifeiliaid;
- (b) i atal y bwydydd anifeiliaid rhag cael eu bwydo i anifeiliaid yn gyffredinol, neu i'w hatal rhag cael eu bwydo i'r anifeiliaid hynny a bennir yn yr hysbysiad;
- (c) i'w gwneud yn ofynnol i'r perchennog neu'r person sy'n meddu ar y bwydydd anifeiliaid eu gwaredu yn unol â'r cyfarwyddiadau a gynhwysir yn yr hysbysiad, gyda derbynydd yr hysbysiad yn ysgwyddo cost y gwarediad hwnnw.

## **RHAN 2**

### **Cynhyrchu protein a bwydydd anifeiliaid**

#### **Mangreoedd sy'n cynhyrchu bwyd anifeiliaid cyfansawdd a fwriedir ar gyfer anifeiliaid nad ydynt yn cnoi cil a ffermir**

6.—(1) Mae'r paragraff hwn yn gymwys i fwyd anifeiliaid cyfansawdd sy'n cynnwys—

- (a) blawd pysgod;
- (b) ffosffad deucalsiwm a thricalsiwm sy'n dod o anifeiliaid; neu
- (c) cynhyrchion gwaed sy'n deillio o anifeiliaid nad ydynt yn cnoi cil.

(2) Rhaid i unrhyw berson sy'n cynhyrchu bwyd anifeiliaid cyfansawdd, neu fwyd anifeiliaid cyflawn o fwyd anifeiliaid cyfansawdd, a fwriedir ar gyfer ei fwydo i anifeiliaid nad ydynt yn cnoi cil a ffermir, wneud hynny yn unol ag Adran B o Bennod III o Atodiad IV ac—

- (a) mewn mangre a awdurdodwyd gan Weinidogion Cymru at ddibenion yr Adran honno; neu
- (b) yn achos cyfansoddyddion cartref sy'n cynhyrchu bwyd anifeiliaid cyflawn o fwyd anifeiliaid cyfansawdd, dim ond pan fônt wedi eu cofrestru at y diben hwnnw gan Weinidogion Cymru.

(3) Mae methu â chydymffurfio â'r paragraff hwn yn drosedd.

### **Blawd pysgod a fwriedir ar gyfer anifeiliaid nad ydynt yn cnoi cil a ffermir**

7.—(1) Rhaid i unrhyw berson sy'n cynhyrchu, yn pecynnu neu'n defnyddio—

- (a) blawd pysgod; neu
- (b) bwyd anifeiliaid cyfansawdd sy'n cynnwys blawd pysgod,

ar gyfer ei fwydo i anifeiliaid nad ydynt yn cnoi cil a ffermir wneud hynny yn unol ag Adran A o Bennod IV o Atodiad IV.

(2) Rhaid i'r ddogfennaeth a'r label sy'n mynd gyda'r blawd pysgod fod yn unol â'r Adran honno.

(3) Mae methu â chydymffurfio â'r paragraff hwn yn drosedd.

### **Ffosffadau deucalsiwm a thricalsiwm a fwriedir ar gyfer anifeiliaid nad ydynt yn cnoi cil a ffermir**

8.—(1) Rhaid i unrhyw berson sy'n pecynnu neu'n defnyddio—

- (a) ffosffad deucalsiwm neu ffosffad tricalsiwm sy'n dod o anifeiliaid; neu
- (b) bwyd anifeiliaid cyfansawdd sy'n cynnwys ffosffadau o'r fath,

ar gyfer ei fwydo i anifeiliaid nad ydynt yn cnoi cil a ffermir wneud hynny yn unol ag Adran B o Bennod IV o Atodiad IV.

(2) Rhaid i'r ddogfennaeth a'r label sy'n mynd gyda'r ffosffadau fod yn unol â'r Adran honno.

(3) Rhaid i unrhyw berson sy'n cludo neu'n storio swmp o'r ffosffadau (neu fwyd anifeiliaid cyfansawdd sy'n cynnwys y ffosffadau) ar gyfer eu bwydo i anifeiliaid nad ydynt yn cnoi cil a ffermir, wneud hynny yn unol ag Adran A o Bennod III o Atodiad IV—

- (a) gan gydymffurfio ag unrhyw weithdrefn a awdurdodwyd gan Weinidogion Cymru at ddibenion yr Adran honno; a
- (b) (yn achos safleoedd storio y mae pwynt 2 o'r Adran honno yn gymwys iddynt), mewn safleoedd storio sydd wedi eu hawdurdodi at y diben hwnnw gan Weinidogion Cymru.

(4) Ni chaiff unrhyw feddiannydd mangre sy'n cadw anifeiliaid a ffermir na fwriedir y ffosffadau ar eu cyfer ddefnyddio na storio'r ffosffadau nac unrhyw fwyd anifeiliaid cyfansawdd sy'n eu cynnwys yn y fangre ac eithrio yn achos bwyd anifeiliaid cyfansawdd—

- (a) pan fo mesurau a gymeradwywyd gan Weinidogion Cymru wedi eu gweithredu yn unol ag Adran D o Bennod III o Atodiad IV; a
- (b) gan gydymffurfio ag amodau unrhyw awdurdodiad a ddyroddir i'r meddiannydd at y diben hwnnw.

(5) Mae methu â chydymffurfio â'r paragraff hwn yn drosedd.

### **Cynhyrchion gwaed a fwriedir ar gyfer anifeiliaid nad ydynt yn cnoi cil a ffermir**

9.—(1) Rhaid i unrhyw berson sy'n casglu neu'n cludo gwaed y bwriedir ei ddefnyddio ar gyfer cynhyrchu cynhyrchion gwaed sy'n deillio o anifeiliaid nad ydynt yn cnoi cil wneud hynny—

- (a) yn unol ag Adran C o Bennod IV o Atodiad IV; a
- (b) (pan fo gwaed yn cael ei gasglu) o ladd-dy sydd wedi ei gofrestru neu ei awdurdodi gan Weinidogion Cymru at y diben hwnnw.

(2) Rhaid i unrhyw berson sy'n cynhyrchu, yn storio, yn cludo, yn pecynnu neu'n defnyddio—

- (a) cynhyrchion gwaed sy'n deillio o anifeiliaid nad ydynt yn cnoi cil; neu
- (b) bwyd anifeiliaid cyfansawdd sy'n cynnwys cynhyrchion o'r fath,

ar gyfer eu bwydo i anifeiliaid nad ydynt yn cnoi cil a ffermir wneud hynny yn unol ag Adran C o Bennod IV o Atodiad IV a chan gydymffurfio ag unrhyw awdurdodiad a ddyroddwyd gan Weinidogion Cymru at ddibenion yr Adran honno.

(3) Rhaid i unrhyw berson sy'n cynhyrchu cynhyrchion gwaed o'r fath neu fwyd anifeiliaid cyfansawdd sy'n cynnwys cynhyrchion o'r fath wneud hynny mewn mangre a gofrestrwyd at ddibenion yr Adran honno gan Weinidogion Cymru, oni bai bod Gweinidogion Cymru wedi awdurdodi fel arall yn unol â'r Adran honno.

(4) Rhaid i'r ddogfennaeth a'r label sy'n mynd gyda'r gwaed neu'r cynhyrchion gwaed fod yn unol â'r Adran honno.

(5) Rhaid i unrhyw berson sy'n cludo neu'n storio swmp o'r cynhyrchion gwaed (neu fwyd anifeiliaid cyfansawdd sy'n cynnwys cynhyrchion o'r fath) ar gyfer eu bwydo i anifeiliaid nad ydynt yn cnoi cil a ffermir, wneud hynny yn unol ag Adran A o Bennod III o Atodiad IV—

- (a) gan gydymffurfio ag unrhyw weithdrefn a awdurdodwyd gan Weinidogion Cymru at ddibenion yr Adran honno; a
- (b) (yn achos safleoedd storio y mae pwynt 2 o'r Adran honno yn gymwys iddynt), mewn safleoedd storio sydd wedi eu hawdurdodi at y diben hwnnw gan Weinidogion Cymru.

(6) Rhaid i unrhyw berson sy'n mewnfurio llwyth o'r cynhyrchion gwaed (neu fwyd anifeiliaid cyfansawdd sy'n cynnwys cynhyrchion o'r fath) o drydedd wlad ar gyfer eu bwydo i anifeiliaid nad ydynt yn cnoi cil a ffermir, sicrhau bod y cynhyrchion yn cael eu dadansoddi yn unol ag Adran C o Bennod III o Atodiad IV er mwyn gwirhau nad oes cyfansoddion heb eu hawdurdodi sy'n dod o anifeiliaid yn bresennol.

(7) Ni chaiff unrhyw feddiannydd mangre sy'n cadw anifeiliaid a ffermir na fwriedir y cynhyrchion ar eu cyfer ddefnyddio na storio'r cynhyrchion nac unrhyw fwyd anifeiliaid cyfansawdd sy'n eu cynnwys yn y fangre ac eithrio yn achos bwyd anifeiliaid cyfansawdd—

- (a) pan fo mesurau a gymeradwywyd gan Weinidogion Cymru wedi eu gweithredu yn unol ag Adran D o Bennod III o Atodiad IV; a
- (b) gan gydymffurfio ag amodau unrhyw awdurdodiad a ddyroddir i'r meddiannydd at y diben hwnnw.

(8) Mae methu â chydymffurfio â'r paragraff hwn yn drosedd.

### **Protein anifeiliaid wedi ei brosesu ac eithrio blawd pysgod a phrotein anifeiliaid wedi ei brosesu sy'n deillio o bryfed a ffermir i'w fwydo i anifeiliaid dyframaethu**

10.—(1) Rhaid i unrhyw berson sy'n cynhyrchu, yn casglu, yn storio, yn cludo, yn pecynnu neu'n defnyddio—

- (a) protein anifeiliaid wedi ei brosesu sy'n deillio o anifeiliaid nad ydynt yn cnoi cil ac eithrio—
  - (i) blawd pysgod; a
  - (ii) protein anifeiliaid wedi ei brosesu sy'n deillio o bryfed a ffermir; neu
- (b) bwyd anifeiliaid cyfansawdd sy'n cynnwys protein o'r fath,

ar gyfer ei fwydo i anifeiliaid dyframaethu wneud hynny yn unol ag Adran D o Bennod IV o Atodiad IV a rhaid iddo gydymffurfio ag amodau unrhyw awdurdodiad a ddyroddwyd gan Weinidogion Cymru at ddibenion yr Adran honno.

(2) Rhaid i unrhyw berson sy'n cynhyrchu'r bwyd anifeiliaid cyfansawdd sy'n cynnwys protein o'r fath, neu fwyd anifeiliaid cyflawn o'r bwyd anifeiliaid cyfansawdd, wneud hynny—

- (a) mewn mangre a awdurdodwyd at y diben hwnnw gan Weinidogion Cymru; neu

- (b) yn achos cyfansoddyddion cartref sy'n cynhyrchu bwyd anifeiliaid cyflawn o fwyd anifeiliaid cyfansawdd, dim ond pan fônt wedi eu cofrestru at y diben hwnnw gan Weinidogion Cymru.
- (3) Rhaid i'r ddogfennaeth a'r label sy'n mynd gyda'r protein anifeiliaid wedi ei brosesu (neu'r bwyd anifeiliaid cyfansawdd sy'n ei gynnwys) fod yn unol â'r Adran honno.
- (4) Rhaid i unrhyw berson sy'n cyflenwi neu'n cludo is-gynhyrchion ar gyfer cynhyrchu'r protein anifeiliaid wedi ei brosesu wneud hynny—
  - (a) yn unol ag Adran D o Bennod IV o Atodiad IV; a
  - (b) pan fo is-gynhyrchion yn cael eu cyflenwi, o ladd-dy, safle torri neu sefydliad arall a gofrestrwyd at y diben hwnnw gan Weinidogion Cymru.
- (5) Mae methu â chydymffurfio â'r paragraff hwn yn drosedd.

### **Protein anifeiliaid wedi ei brosesu sy'n deillio o bryfed a ffermir i'w fwydo i anifeiliaid dyframaethu**

**11.—(1)** Rhaid i unrhyw berson sy'n cynhyrchu, yn storio, yn cludo, yn pecynnu neu'n defnyddio—

- (a) protein anifeiliaid wedi ei brosesu sy'n deillio o bryfed a ffermir; a
  - (b) bwyd anifeiliaid cyfansawdd sy'n cynnwys protein o'r fath,
- ar gyfer ei fwydo i anifeiliaid dyframaethu wneud hynny yn unol ag Adran F o Bennod IV o Atodiad IV a rhaid iddo gydymffurfio ag amodau unrhyw awdurdodiad a ddyroddwyd gan Weinidogion Cymru at ddibenion yr Adran honno.
- (2) Rhaid i unrhyw berson sy'n cynhyrchu'r bwyd anifeiliaid cyfansawdd sy'n cynnwys protein o'r fath, neu fwyd anifeiliaid cyflawn o'r bwyd anifeiliaid cyfansawdd, wneud hynny—
    - (a) mewn mangre a awdurdodwyd at y diben hwnnw gan Weinidogion Cymru; neu
    - (b) yn achos cyfansoddyddion cartref sy'n cynhyrchu bwyd anifeiliaid cyflawn o fwyd anifeiliaid cyfansawdd, dim ond pan fônt wedi eu cofrestru at y diben hwnnw gan Weinidogion Cymru.
  - (3) Rhaid i'r ddogfennaeth a'r label sy'n mynd gyda'r protein anifeiliaid wedi ei brosesu (neu'r bwyd anifeiliaid cyfansawdd sy'n ei gynnwys) fod yn unol â'r Adran honno.
  - (4) Mae methu â chydymffurfio â'r paragraff hwn yn drosedd.

### **Amnewidion llaeth sy'n cynnwys blawd pysgod i'w bwydo i anifeiliaid cnoi cil heb eu diddyfnu**

- 12.—(1)** Rhaid i unrhyw berson—
- (a) sy'n cynhyrchu blawd pysgod i'w ddefnyddio mewn amnewidion llaeth i'w bwydo i anifeiliaid cnoi cil a ffermir heb eu diddyfnu, neu
  - (b) sy'n cynhyrchu, yn storio, yn cludo, yn pecynnu neu'n defnyddio amnewidion llaeth sy'n cynnwys blawd pysgod i'w bwydo i anifeiliaid cnoi cil a ffermir heb eu diddyfnu,
- wneud hynny yn unol ag Adran E o Bennod IV o Atodiad IV a chan gydymffurfio ag unrhyw weithdrefn a awdurdodwyd gan Weinidogion Cymru at ddibenion yr Adran honno.
- (2) Rhaid i unrhyw berson sy'n cynhyrchu'r amnewidion llaeth wneud hynny mewn mangre a awdurdodwyd at y diben hwnnw gan Weinidogion Cymru.
  - (3) Rhaid i'r ddogfennaeth a'r label sy'n mynd gyda'r amnewidion llaeth fod yn unol ag Adran E o Bennod IV o Atodiad IV.

(4) Rhaid i unrhyw berson sy'n mewnfurio llwyth o'r amnewidion llaeth o drydedd wlad sicrhau bod pob llwyth yn cael ei ddadansoddi gan gydymffurfio â'r Adran honno er mwyn gwirhau nad oes cyfansoddion heb eu hawdurdodi sy'n dod o anifeiliaid yn bresennol.

(5) Rhaid i unrhyw feddiannydd mangre sy'n defnyddio amnewidion llaeth i'w bwydo i anifeiliaid cnoi cil sydd heb eu diddyfnu ac sy'n cadw anifeiliaid cnoi cil eraill yn y fangre fod wedi ei gofrestru gyda Gweinidogion Cymru at ddibenion yr Adran honno.

(6) Mae methu â chydymffurfio â'r paragraff hwn yn drosedd.

### **Protein anifeiliaid wedi ei brosesu, gan gynnwys blawd pysgod, sy'n deillio o anifeiliaid nad ydynt yn cnoi cil**

13.—(1) Mae'r paragraff hwn yn gymwys i—

(a) protein anifeiliaid wedi ei brosesu sy'n deillio o anifeiliaid nad ydynt yn cnoi cil, gan gynnwys blawd pysgod a phrotein anifeiliaid wedi ei brosesu sy'n deillio o bryfed a ffermir, a

(b) bwyd anifeiliaid cyfansawdd sy'n cynnwys protein o'r fath.

(2) Rhaid i unrhyw berson sy'n cludo neu'n storio swmp o'r protein ar gyfer ei fwydo i anifeiliaid nad ydynt yn cnoi cil a ffermir, wneud hynny yn unol ag Adran A o Bennod III o Atodiad IV—

(a) gan gydymffurfio ag unrhyw weithdrefn a awdurdodwyd gan Weinidogion Cymru at ddibenion yr Adran honno; a

(b) (yn achos safleoedd storio y mae pwynt 2 o'r Adran honno yn gymwys iddynt), mewn safleoedd storio sydd wedi eu hawdurdodi at y diben hwnnw gan Weinidogion Cymru.

(3) Rhaid i unrhyw berson sy'n mewnfurio llwyth o'r protein o drydedd wlad ar gyfer ei fwydo i anifeiliaid nad ydynt yn cnoi cil a ffermir, sicrhau ei fod yn cael ei ddadansoddi yn unol ag Adran C o Bennod III o Atodiad IV er mwyn gwirhau nad oes cyfansoddion heb eu hawdurdodi sy'n dod o anifeiliaid yn bresennol.

(4) Ni chaiff unrhyw feddiannydd mangre sy'n cadw anifeiliaid a ffermir na fwriedir y protein ar eu cyfer ddefnyddio na storio'r protein nac unrhyw fwyd anifeiliaid cyfansawdd sy'n ei gynnwys yn y fangre ac eithrio yn achos bwyd anifeiliaid cyfansawdd—

(a) pan fo mesurau a gymeradwywyd gan Weinidogion Cymru wedi eu gweithredu yn unol ag Adran D o Bennod III o Atodiad IV; a

(b) gan gydymffurfio ag amodau unrhyw awdurdodiad a ddyroddir i'r meddiannydd at y diben hwnnw.

(5) Mae methu â chydymffurfio â'r paragraff hwn yn drosedd.

### **Deunyddiau bwyd anifeiliaid a bwyd anifeiliaid cyfansawdd**

14.—(1) Rhaid i unrhyw berson sy'n cludo ac yn storio swmp o ddeunyddiau bwyd anifeiliaid a swmp o fwyd anifeiliaid cyfansawdd sy'n cynnwys deunyddiau sy'n deillio o anifeiliaid cnoi cil wneud hynny yn unol ag Adran B o Bennod V o Atodiad IV a chan gydymffurfio ag unrhyw weithdrefn a awdurdodwyd gan Weinidogion Cymru at ddibenion yr Adran honno.

(2) Rhaid i unrhyw berson sy'n cynhyrchu bwyd anifeiliaid cyfansawdd a fwriedir ar gyfer anifeiliaid ffwr neu ar gyfer anifeiliaid anwes sy'n cynnwys cynhyrchion sy'n deillio o anifeiliaid cnoi cil neu o anifeiliaid nad ydynt yn cnoi cil wneud hynny yn unol ag Adran C o Bennod V o Atodiad IV.

(3) Ni chaiff unrhyw feddiannydd mangre sy'n cadw anifeiliaid a ffermir ddefnyddio na storio unrhyw ddeunyddiau bwyd anifeiliaid na bwyd anifeiliaid cyfansawdd ar gyfer anifeiliaid a ffermir

sy'n cynnwys deunyddiau sy'n deillio o anifeiliaid cnoi cil ac eithrio yn unol ag Adran D o Bennod V o Atodiad IV.

(4) Mae methu â chydymffurfio â'r paragraff hwn yn drosedd.

### **Allforio protein anifeiliaid wedi ei brosesu i drydydd gwledydd**

**15.**—(1) Mae'n drosedd allforio i drydedd wlad brotein anifeiliaid wedi ei brosesu sy'n deillio o anifeiliaid cnoi cil, neu brotein anifeiliaid wedi ei brosesu sy'n deillio o anifeiliaid cnoi cil ac anifeiliaid nad ydynt yn cnoi cil, ac eithrio yn unol â'r amodau ym mhwynt 1 o Adran E o Bennod V o Atodiad IV.

(2) Mae'n drosedd allforio i drydedd wlad gynhyrchion sy'n cynnwys protein anifeiliaid wedi ei brosesu sy'n deillio o anifeiliaid cnoi cil, ac eithrio yn unol â'r amodau ym mhwynt 2 o Adran E o Bennod V o Atodiad IV.

(3) Mae'n drosedd allforio i drydedd wlad brotein anifeiliaid wedi ei brosesu sy'n deillio o anifeiliaid nad ydynt yn cnoi cil, neu fwyd anifeiliaid cyfansawdd sy'n cynnwys protein o'r fath, ac eithrio yn unol â'r amodau ym mhwynt 3 o Adran E o Bennod V o Atodiad IV a chan gydymffurfio ag amodau unrhyw awdurdodiad a ddyroddwyd gan Weinidogion Cymru at y diben hwnnw.